

Për tërë natën lexova një raport sekret të N. Hrushovit që na u dha edhe neve si gjithë delegacioneve të tjera të huaja. Raporti hedh poshtë figurën dhe veprën e madhe të Stalinit.

E ndjeva qëndrimin e Hrushovit me shokë ndaj Stalinit dhe veprës së tij të lavdishme që gjatë punimeve të kongresit ku emri i tij nuk u përmend asnjëherë për mirë, po se arrinin deri këtu nuk ma merrte mendja.

Rrëqethem kur mendoj se sa do të gëzohen borgjezia dhe reaksioni po ta shtijnë në dorë këtë raport, ç'fushatë shpifjesh do të fryjnë e sa do të zgjatin. Lëre pastaj Titoja ç'është kënaqur e krekosur kur, me siguri, e ka lexuar.

Ç'dëm i pallogaritshëm për Bashkimin Sovjetik dhe kampin e socializmit! Ç'përgjegjësi e turpshme përpara historisë!

Nuk mund të hedh në letër asgjë tjetër. Është pak të them: «jam i tronditur»!